

Garde un Keller



Dhinnem Bühl hebbe mir en Garde ghat. Im voddere Dääl hot die Modder e paar Häbli Graut, Zalat, Zwübbel, Peterli un Schnittlauch un a e paar Blumme gezücht. Zwischen sen zwä Schträucher mit Schtachelbeer un een Schtrauch mit Kanschträübli gschtanne. Am Gardewächle entlang hebbe mer sogar e paar Erdbeern ghat.

Im hinnere Dääl vom Garde warn im Summer die Hüngeli. Dort sen a zwä Quetsche- un een Zipperlesbaam gschtanne. Dene Hüngeli hot mer jeden Daach es kleens Schtückle ümschorn gmößt, daß die was zum gratze und schörre ghat hebbe.

Neberm Bühlgarde hebbe mer a no en Grautgarde ghat. Dort sen Buone, Erbes, Graut, Gmüs un Rummelsche gschtanne. Obscht un Gmüs un was mer sunscht so alles gerndet hebbe sen im Keller uffghobe worn.

Unner unserm Haus, do war zwar en Keller. Der hot uns äbber net geköhrt. In de eene Hälft hebbe es Röckeles ihr Kartoffel un die annere Hälft hot de Faselbröünich sein Moscht ghat. Unser Keller war hinnerm Haus unner unserer Schäuern. Wenn mer in de Keller neikumme is dann sin uff de rechte Seide zuerscht die Rummelsche gläche. Dehinner warn dann die zwä Schtenner fürs Sauergraut un die saure Boune un dezwisehe no e kleens Schtennerle mit einglejchti Eier.

Uff de linke Seide war ganz vorne en kleene Haufe Sand. In den sen die Gelbe Rübe eigegrabe worn un manchmols a e paar Häbli Routgraut. Dodenoch sen em Babba sei Moschtfässer kumme un übber de Fässer do war e Holzgrüschti für die Öpfel.

Ganz hinne im Keller warn zwä mit groußi Schteeplatte gmachti Behälter für die Grummbirn. Uff de eene Seide sen die Sükartöffeli un uff de annere Seide unser Kartoffel neikumme. Die Kartoffel sen uff em blanke Lehmeboden gläiche un warn dodeweche bis lang ins Frühjohr nei frisch.

Ja un dann hots bei uns halt Kartoffel gäbbe: Quellkartoffel, Kartoffelschnitz, Kartoffelschtücker, Kartoffelgmüs, Gröschti Kartoffel, Kartoffelschäufeli, Kartoffelzalat, Kartoffelpannekuche un Kartoffelsuppe. Dezu hotts Sauergraut, saueri Boune, Wersching, Rousche- un Blumekohl, Rot- und Weißgraut, Eigmachts, Eier un Obst gäbbe. Alles also Sache ausm Garde un ausm Keller.

Ein Glück, daß es domols Garde un Keller gäbbe hot.

